

No. 40 CHUMBA CHA ELISHA

"Habari yako, mchungaji Elisha. Waonekana mchovu sana. Je, waweza kuja nyumbani kwetu na upumzike kidogo? Je, utakula pamoja nasi?" Mwanamke mmoja alimwuliza Elisha.

"Asante sana, lakini natakiwa kuendelea na safari," Elisha akamwambia.

"Tafadhali njoo. Tunataka upumzike kabla ya kufika uendako." Mwanamke huyu alimkaribisha mchungaji Elisha nyumbani kwake.

Elisha alikubaliana naye. Alikuwa amechoka sana. Alikuwa ametembea safari ndefu wakati wa jua kali.

Aliingia katika nyumba. Mwanamke huyo pamoja na mumewe waliongea na Elisha. Hata wakampikia chakula.

"Umewahi kufika katika kijiji chetu," mwanamke huyo akamwambia.

"Ndiyo, mimi hutembelea vijiji vingi sana. Hata huwa napita hapa mara kwa mara," Elisha akamwambia.

"Unakaribishwa kuja na kupumzika hapa kwetu iwapo utakuwa safarini."

Mchungaji Elisha aliendelea na safari yake, baada ya kupumzika. Kila mara alipokuwa safarini, aliweza kufika na kupumzika katika nyumba ya rafiki yake.

Siku moja mwanamke huyu mwema alimwambia mumewe, "Naamini kwamba mchungaji Elisha anampenda Mungu sana. Nafurahi kwa sababu anataka kushiriki Neno la Mungu na watu wengine. Je, tungefanya nini ili tumsaidie?"

"Tunaweza kumjengea chumba. Pia, tutamwekea chumbani humo kitanda, kiti na meza. Ajapo tena atakuwa na chumba chake mwenyewe. Hata anaweza kupumzikia humo."


Mwanamke huyo na mumewe walifurahi sana. Walikuwa wamemtengenezea Elisha mahali pa kukaa.

Elisha naye, alifurahi sana. Alishukuru sana kwa ajili ya chumba hicho maalum alichojengewa na rafiki zake.

Msingi wa somo ni 2 Wafalme 4:8-10)

No. 40 Chumba Cha Wageni Cha Elisha

© Copyright 1986, Baptist Publications House, Nairobi, Kenya, All Rights Reserved



"Bwana yu Mwema" (Zaburi 34:8)

No. 41 BOAZI MKULIMA

“Naomi, hatuna chakula. Nitaenda shambani na nikusanye nafaka,” Ruthu akamwambia.

Muda si muda, Ruthu alilifikia shamba ambalo watu walikuwa wakifanya kazi.

“Je, naweza kuokota nafaka mnazoangusha?” akawauliza.

“Ndiyo, Boazi hawezi kukasirika iwapo utaokota.” Watu hao wakamjibu.

Ruthu alikusanya nafaka nyingi sana. Baadaye Boazi, mkulima, alifika shambani. Alimwona Ruthu akiokota nafaka zilizoachwa.

“Je, mwanamke huyu ni nani?” akawauliza.

“Anaitwa Ruthu. Anatoka katika nchi ya Moabu. Naye anaishi na Naomi,” wakamjibu.

Boazi mkulima, aliongea na Ruthu. “Waweza kuendelea kukusanya nafaka shambani mwangu. Usiende katika shamba lingine lolote. Pia, waweza kuuliza maji ya kunywa usikiapo kiu.”

Ruthu akamwambia, “Asante sana. Mbona u mwema jinsi hiyo kwangu? Mimi ni mgeni tu katika nchi yenu.”

“Nimesikia jinsi ulivyo mwema kwa Naomi. Nami nataka kuwasaidia,” Boazi akamjibu.


Ruthu alifanya kazi hadi jioni sana. Alikusanya nafaka nyingi sana.

“Ruthu, umeokota wapi nafaka hii yote?” Naomi akamwuliza.

“Nilienda katika shamba la Boazi,” Ruthu akamjibu. “Aliniambia kwamba naweza kurudi kila siku yote ili niweze kukusanya tena nafaka.”

Naomi na Ruthu walimshukuru Mungu sana kwa ajili ya Boazi, rafiki yao. Walishukuru kwa kupata rafiki wa kuwasaidia.

Msingi wa somo ni Ruthu 2



No. 42 MARAFIKI WANNE WEMA

“Watu wanne walikuwa wakijadiliana. “Yesu yuko mjini. Anawahubiria watu. Natamani sana rafiki yetu mgonjwa amwone. Naamini kwamba Yesu atamponya.”

Walienda hadi kwa nyumba ya rafiki yao. Alikuwa amelala kitandani. Hakuweza kutembea. Kwani miguu yake haikufanya kazi.

“Rafiki, Yesu yuko mjini. Je, utaenda kumwona?” wakamwuliza.

“Ndiyo, natamani sana kumwona. Lakini naendaje? akawauliza.

“Tutakubeba ukiwa juu ya godoro lako”, wakamwambia. Walimbeka mtu huyo kwa uangalifu akiwa juu ya godoro lake.

Waliona watu wengi sana walipofika karibu na nyumba ile Yesu alikuwemo. Yule mgonjwa akawaambia, “Nadhani sitaweza kumwona Yesu, kwa sababu kuna watu wengi sana.”

Rafiki hao wanne walipanda hadi juu ya paa la nyumba. Wakamweka mgonjwa huyo chini. Wakaanza kutoboa shimo katika paa hilo. Mwishowe kulikuwa na shimo kubwa sana. Hata waliweza kumwona Yesu vizuri sana.

Walimtelemtsha rafiki yao chini wakitumia kamba. Yesu alipomwona mtu huyo akasema, “Jitwike godoro lako na uende.”

Mgonjwa alisimama mara moja. Miguu yake ikaanza kufanya kazi. Hata aliweza kutembea.

Rafiki zake walifurahi sana kwa sababu waliweza kumsaidia.

Msingi wa somo ni Marko 2:1-12



No. 43 RAFIKI WA KIPOFU

Mtu mmoja alikaa kando ya barabara. Akasikia watu wakitembea na kupita mahali hapo. Alisikia sauti nyingi tofauti lakini hakuona cho chote. Alikuwa kipofu.

Alikuwa kipofu tangu kuzaliwa. Hakuweza kuona kamwe. Ila kila siku alikaa tu kando ya barabara. Alikuwa akiomba pesa za kujinunulia chakula.

Siku moja Yesu alipita mahali hapo. Akamwona mtu huyo. Hatimaye alitengeneza tope kwa mate yake na kuupaka machoni mwa kipofu huyo.

Baadaye Yesu akamwambia, “Nenda kanawe katika birika la Siloamu.”

Kipofu huyu alifanya jinsi alivyoambiwa na Yesu. Alienda katika kiziwa hicho na akanawa uso wake.

Alipoosha tope hilo kutoka usoni, aliweza kuona vizuri. Akaangalia pale alipokuwa amesimama. Akaona mbingu ya rangi ya samawati (buluu). Akaona tena wanaume na wanawake wakitembea.

Alifurahi sana akapaza sauti akisema, “Naweza kuona.”

Jirani zake walimwanguka. Hata wakaulizana, “Je, huyu ndiye yule kipofu?”

Mtu huyo aliwajibu, “Ndiyo, ni mimi. Mtu aitwaye Yesu alitengeneza tope, halafu akanipaka machoni mwangu. Mwishowe akaniambia niende kunawa uso wangu. Ndiyo maana sasa naweza kuona.”

“Haiwezekani hivyo. Umekuwa kipofu siku zote,” wakamjibu.

“Naweza kuona,” akawaambia tena. “Rafiki yangu, Yesu, amenisaidia.”

Msingi wa somo ni Yohana 9

No. 43 Kumsaidia Kipofu

© Copyright 1986, Baptist Publications House, Nairobi, Kenya, All Rights Reserved



"Yesu...akazunguka huko na huko, akitenda kazi njema"
(Matendo 10:38)

No. 44 USIKU NA MCHANA

Mungu aliumba mbingu na nchi. Kwanza kabisa hapakuwa na nchi, wala cho chote. Kulikuwa tu giza tupu. Hakukuwa na nuru yo yote.

Mungu akasema, "Iwe Nuru."

Nuru ilitokea. Mungu aliona kwamba nuru inapendeza. Akaita wakati huu wa nuru mchana. Na akaita wakati wa giza usiku.

Mwishowe Mungu alitoa ahadi. Alisema kwamba jinsi nchi inavyodumu vivyo hivyo kutakuwepo mchana na usiku.

Yakobo alikuwa safarini. Naye alikuwa ametembea kwa muda mrefu sana. Ilipofika usiku, hakuwa na mahali pa kulala. Aliweka jiwe kubwa chini ya kichwa chake na akalala usingizi. (Onyesha picha namba 44).

Alipokuwa akilala aliota ndoto. Mungu alisema naye katika ndoto hiyo. Mungu alimwambia, "Nitakulinda. Tena niko pamoja nawe kila uendako."

Yakobo aliamka baada ya kuota ndoto hiyo. Akasema, "Kweli Bwana yupo mahali hapa. Naye atanilinda."

Yakobo alifurahi sana usiku huo wote. Alifurahi kwa sababu alipata muda wa kupumzika. Alifurahi pia, kwa sababu Mungu aliahidi kuwa pamoja naye na kumtunza.

Miaka mingi baadaye mtu mmoja aliandika wimbo kuhusu usiku:

"Mungu aliumba mwezi na majira.

Jua hujua wakati wa kuchwa.

Mungu aliumba giza.

Wanyama hutoka mwituni wakati wa usiku.

Watoto wa Simba hutafuta chakula.

Wakati wa mapambazuko, wao hutoroka,

Huenda kulala katika pango.

Mwanadamu naye huamka. Na kufanya kazi hadi jioni"

No. 44 Wakati wa Usiku

© Copyright 1986, Baptist Publications House, Nairobi, Kenya, All Rights Reserved



"Mungu akaita nuru Mchana, na giza akaita Usiku" (Mwanzo 1:5)

No.45 MVUA

“Mungu amesema kwamba hakutakuwa na mvua kwa muda wa miaka mingi. Lakini kutakuwa na mvua tu, Mungu atakaposema,” Eliya akawaambia.

Eliya alikuwa akisema na mfalme Ahabu. Ahabu alikuwa amefanya mambo mengi sana kinyume cha Mungu. Mungu angezuia mvua kutonyesha.

Mvua haikunyesha jinsi Mungu alivyomwambia Eliya. Haikunyesha kwa muda miaka mitatu. Nyasi hazikukua wala mimea. Hakukuwa na chakula cha kutosha wala maji.

Siku moja Mungu alimwambia Eliya kwamba, “Nenda ukamwambie mfalme Ahabu kwamba mvua itanyesha. Nitawapatia mvua.”

Eliya alipanda hadi mlimani kwenda kuomba. Aliomba na akamwambia msaidizi wake kwamba, “Tazama juu mbinguni. Je, unaona wingu lo lote?”

Eliya alimtuma msaidizi wake mara saba kwenda na kutazama kama kuna mawingu angani. Mara ya saba alirudi akiwa mwenye furaha.

Akasema, “Nimeona wingu. Lakini ni ndogo sana. Ni sawa tu na mkono wa mtu.”

“Ni lazima umwambie Ahabu. Ni lazima umwambie kwamba mvua itanyesha. Mungu atatuma mvua,” Eliya akamwambia.

Wingu hilo dogo liliendelea kuwa kubwa zaidi na zaidi. Kukaanza kuwa na giza. Upepo nao ukaanza kuvuma. Ukaendelea kuwa mwingi sana. Matone ya maji yakaanza kudondoka. Muda si muda yakaanza kutiririka kwa wingi na kwa haraka. Hatimaye mvua kuu ilinyesha nchini kote.

Msingi wa somo ni 1 Wafalme 17:1; 18:1-2, 41-45

No. 45 Mvua

© Copyright 1986, Baptist Publications House, Nairobi, Kenya, All Rights Reserved



"Mungu wetu, aletaye mvua" (Yeremia 5:24)

No. 46 JUA

Mungu aliumba kila kitu. Aliumba nchi. Akaumba anga na wanyama. Aliumba pia, mwezi na nyota na hata jua.

Mungu alikuwa na kusudi maalum la kuumba kila kitu. Jua ni kubwa na hutoa mwangaza. Sisi hupata nuru linapotoa mwangaza. Nuru hutusaidia kuona jinsi tufanyavyo kazi. Kusingekuwapo na nuru, basi tungeishi katika giza. Hatungeweza kucheza wala kuona kazi tufanyayo.

Jua husaidia mbegu kukua. Mbegu huhitaji udongo, maji na mwangaza wa jua. Sisi hupanda mbegu kabla ya mvua kuanza. Mvua husaidia mbegu kukua. Lakini ni lazima zipate mwangaza.

Jua hutoa joto. Nchi hupata joto hili. Hata nasi pia husikia joto hili. Hebu fikiria kuhusu usiku wenye baridi sana. Kuna giza na pia unasikia baridi. Hatimaye kunakucha. Na jua nalo limetoa mwangaza. Hapo huamka kutoka kitandani na kwenda kuota jua. Jinsi uendeleavyo kusimama katika jua ndivyo unavyo zidi kusikia joto zaidi na zaidi. Mwishowe huwa husikii baridi tena. Basi tumshukuru Mungu kwa kuumba jua litupalo joto.

Jua hufanya kazi ambayo sisi huiona. Jua hukausha maji ya mvua kutoka ardhini. Kama kusingekuwa na jua basi maji ya mvua yangekuwa juu ardhini. Hata maji hayo yangeweza kuwa mengi na mengi zaidi.


Kama kusingekuwa na jua, basi nguo zilizolowa hazingeweza kukauka, joto la jua hukausha nguo.

Tunashukuru sana kwa sababu Mungu aliumba jua. Hasa jua hutusaidia kwa njia nyingi sana.

Msingi wa somo ni Mwanzo 1:14-19

No. 46 Mapambazuko

• Copyright 1986, Baptist Publications House, Nairobi, Kenya, All Rights Reserved



"Baba yenu aliye mbinguni...huwaangazia jua lake"
(Mathayo 5:45)

No. 47 VITU VINAVYOKUA

Yesu alisimulia hadithi ya mkulima aliyepanda mbegu nyingi sana. Mkulima huyu alienda shambani kwake na akaanza kupanda mbegu.

Baadhi ya mbegu hizo zilianguka karibu na njia. Hazikufunikwa na udongo. Ndege waliona mbegu hizo na wakaja wakazila zote.

Mbegu nyingine zilianguka pasipo na udongo mwingi. Zilimea kwa haraka sana. Lakini mizizi yake haikuweza kukua vizuri kwa sababu udongo huo ulikuwa na mawe. Jua lilipozuka, mimea hii iliungua na kukauka.

Mbegu nyingine nazo zilianguka penye miiba na mimea myengine. Mbegu hizi ziliota na kuanza kukua. Magugu nayo yalianza kukua. Hatimaye yalifunika mbegu hizo. Hata hazikupata nafasi ya kuendelea kukua. Mwishowe zilinyauka na kuharibika.

Hata hivyo, mbegu nyingine zilianguka katika udongo mzuri. Naye Mungu akainyesha mvua. Akaleta mwangaza wa jua. Mbegu hizi ziliota na kuanza kukua. Mwishowe zilizaa mavuno mengi.

Biblia inatuambia jinsi Mungu alivyovipangia vitu kukua. Kuna wimbo katika Biblia unaoeleza jinsi mimea hukua. Unasema hivi:

“Mungu hukuza majani.

Mungu hukuza mimea, na mwanadamu hupalilia.

Mimea huleta chakula kwa mwanadamu.”

Msingi wa somo ni Mathayo 13:1-8

No. 47 Wakati wa Mavuno

© Copyright 1986, Baptist Publications House, Nairobi, Kenya, All Rights Reserved



"Mungu huyameesha majani" (Zaburi 104:14)

No. 48 ULIMWENGU MZURI

Mungu aliumba mbingu na nchi. Aliumba pia nuru na giza. Aliita nuru mchana na akaliita giza usiku.

Mungu aliumba nchi na maji. Akaifanya mimea na miti kukua. Aliumba mwezi, nyota na jua. Akawaumba wanyama watembeao. Aliwaumba samaki waogeleao baharini na ndege warukao angani. Alimwumba pia mwanadamu.

Mungu aliumba milima mirefu sana. Akaumba na hata mabonde. Aliikuza miti mirefu na kijani kibichi mabondeni na akaifanya mito kupita humo.

Mungu aliumba najangwa yaliyokauka na yenye mchanga mweupe sana. Akalifanya jua litoe mwangaza na joto.

Mungu aliumba ndovu wakubwa wenye ngozi ngumu. Aliwaumba pia sungura wenye manyoya laini na nyororo. Aliumba hata swara wakimbiao haraka sana. Simba nao waliumbwa na manyoya mengi yafunikayo vichwa vyao. Aliwaumba hata chui wenye madoadoa ya kupendeza.


Aliyakuza maua mazuri ya kupendeza. Kuna maua mekundu na ya majano. Kunayo pia meupe na ya aina ya buluu.

Mungu aliipangia mvua kunyesha. Mvua huifanya miti na maua kukua.

Mungu aliwaumba watu ili waishi katika ulimwengu huu wake. Watu nao wanayo mikono ya miguu iwasaidiapo kutembea na kufanya kazi. Wanayo macho, hata wanaweza kuona. Wana sauti nzuri za kuimba. Wana hata mioyo ambayo imejua upendo.

Mungu aliumba kila kitu. Vitu hivi vyote vinatofautiana. Kila kimoja kina maumbile yake. Kweli, Mungu aliumba kila kitu kikawa kizuri.

Msingi wa somo ni Mwanzo 1-2



"Kila kitu amekifanya kizuri" (Hubiri 3:11)

11/11/2014

No.49 MALAIKA WAMTEMBELEA MARIAMU

"Siku moja Mariamu alikuwa akifanya kazi nyumbani kwao. Akasikia sauti ikiongea naye.

"Umebarikiwa. Mungu yu pamoja nawe," Malaika akamwambia.

Mariamu alifadhaika sana aliposikia maneno ya malaika. Hakujua angeendelea kumwambia nini.

"Mariamu, usiogope. Nina habari njema ya kukuambia. Utachukua mimba na kumzaa mtoto. Utamwita Yesu. Huyo atakuwa mkuu. Naye atakuwa Mwana wa Mungu".

Malaika aliondoka, alipomaliza kuongea na Mariamu. Naye Mariamu alifurahi sana alipofikiria zaidi kuhusu ujumbe huu. Aliamua kwenda na kumtembelea Elizabeti, binamu yake. Alitaka amwambie Elizabeti habari hii njema.

Mariamu alimsalimia Elizabeti alipofika nyumbani kwake. Naye Elizabeti alipomsikia Mariamu akiongea, alijua kwamba ana habari njema. "Mariamu, umebarikiwa sana na Mungu," akamwambia.

Mariamu na Elisabeti, waliongea kwa muda mrefu sana pamoja. "Namshukuru Mungu sana," Mariamu akamwambia. "Roho yangu imemfurahia Mungu. Kwani yeye atanitumia. Vizazi vyote vitaniita mbarikiwa. Mungu ni mwenye uwezo. Naye amenitendea makuu."

"Jina lake ni takatifu. Naye ni mwenye rehema, pia na nguvu. Atawatawanya walio na kiburi. Lakini atawakweza walio wanyenyekevu."


"Mungu alikuwa ameahidi kuwaokoa watu wake. Naye angewaokoa kupita kwa Yesu."

Mariamu alikaa kwa Elizabeti kwa muda wa miezi mitatu. Baadaye, siku moja akasema, "Nimefurahi sana kuishi pamoja nawe. Lakini sasa nami nataka nirudi nyumbani kwangu."

Msingi wa somo ni Luka 1:26-56

No. 49 Malaika Asema na Maria

© Copyright 1986, Baptist Publications House, Nairobi, Kenya, All Rights Reserved



"Nitamwimbia Bwana" (Kutoka 15:1)

No. 50 KUZALIWA KWA YESU

“Mfalme amesema kwamba kila mtu aende kijijini mwake. Yampasa kila mmoja kwenda na kuandika jina lake katika kitabu. Kwa hivyo tutatakiwa kwenda Bethlehemu,” Yusufu akamwambia.

Mariamumu alijua kwamba ingekuwa safari ndefu sana. Alijua pia kwamba Mungu angewatunza. Mariamumu kapanda juu ya punda. Safari yao ilianza. Yusufu alimwongoza punda barabarani.

Yusufu alijua kwamba Mariamumu amechoka. Kwa hivyo walipumzika mara kwa mara. Walikutana na watu wengi sana huko barabarani. Kila mmoja alikuwa akirudi kijijini kwao kufuatia agizo la mfalme.

“Yusufu, je, tungali mbali kufika?” Mariamumu akamwuliza.

Waliufikia mlima, na mbele yake, Yusufu aliweza kuona kijiji kile vizuri sana. “Tazama, Bethlehemu ndipo pale. Muda si muda tutafika mahali hapo.”

Mariamumu alifurahi sana wakati punda wao alipotembea katika kijiji hicho. Yusufu naye alienda hadi katika nyumba ya wageni.

“Bwana, tunahitaji mahali pa kulala usiku wa leo. Tumesafiri safari ndefu sana na tumechoka sana,” Yusufu akamwambia.

“Samahani sana, hakuna nafasi ye yote. Watu wengi wamefika mjini, kwa hivyo hakuna nafasi katika chumba cho chote,” mtu huyo akamjibu.

Mtu huyo alimwona Mariamumu akiwa mchovu sana. Akamwambia, “Unaweza kwenda kulala katika zizi la ng’ombe. Nitakutafutia majani mazuri ya kulalia. Samahani sana kwa sababu hapo ndipo pana nafasi tu.”

Yusufu alimwalia Mariamumu. Mariamumu akamwambia, “Ndiyo, Yusufu, nilazima twende kupumzika.”

Usiku huo huo, mtoto Yesu alizaliwa. Mariamumu alimfunga katika nguo nyororo na yenye joto. Akamlaza katika hori ya kulia ng’ombe.

Msingi wa somo ni Luka 2:1-7



"Mungu...alitupenda sisi, akamtuma Mwanawe" (1 Yohana 4:10)

No.51 WACHUNGAJI NA MALAIKA

Ulikuwa usiku mtulivu. Nyota zilikuwa zikiangaza angani. Kondoo nao walikuwa wamejikufanya na kulala pamoja. Wachungaji nao walikua wamekaa katika mviringo, huku wakiota moto. Wakawa wanaongea kwa sauti za chini sana. Usiku huo ulikuwa mtulivu na wenye giza kuu.

Mwangaza mkuu uliwangaria kwa ghafula wachungaji hao. Walishangaa sana, na wakaingiwa na hofu kuu. Mwangaza huo ulikuwa mwingi sana hata hawakuweza kuangalia juu. Wakafunika nyuso zao.

Malaika aliwaambia, "Msiogope, kwa maana mimi nawaletea habari njema. Habari hii itawafurahisha sana. Na watu wote wataisikia habari hii."

"Yesu amezaliwa katika Bethlehemu. Yeye ndiye atakayekuwa Mwokozi wa ulimwengu. Mtampata akiwa amelala katika hori ya kulia ng'ombe."

Mara walitokezea wingi wa jeshi la malaika juu mbinguni. Wakaimba wimbo wa kumsifu Mungu. Waliimba hivi: "Atukuzwe Mungu juu mbinguni. Na duniani iwe amani kwa watu aliowaridhia."

Wachungaji hao waliangaliana. Hatimaye mmoja wao akasema, "Haya na twendeni mpaka Bethlehemu. Tukamwone mtoto huyo tuliyeambiwa na malaika."

Wachungaji hao waliuzima moto wao. Wakachukua fimbo zao, na wakaenda kwa haraka hadi mjini. Pengine walipokuwa wakienda walizungumza na kuulizana maswali.

"Je, kweli twampata mtoto huyu?"

"Hebu fikiriri tu. Malaika ndio waliotuletea habari hii njema."

Walipofikia mahali ambapo Yusufu na Mariamu walikuwa wanaishi, wakamwona mtoto Yesu. Alikuwa bado amelala katika hori ya kulia ng'ombe jinsi malaika alivyo waambia.

Wachungaji hao walimsifu Mungu kwa kutuma Yesu hapa duniani. Walimwambia kila mtu waliyemwona habari hii njema.

No. 51 Wachungaji Wapata Habari za Kuzaliwa kwa Yesu

• Copyright 1986, Baptist Publications House, Nairobi, Kenya, All Rights Reserved



"Nitalisifu jina la Mungu kwa wimbo" (Zaburi 69:30)

No.52 ZAWADI ZA YESU

“Hebu njoo uone. Kumetokezea nyota,” mamajusi mmoja alisema. Je, inamaanisha nini?”

“Nafikiria inamaanisha kwamba mfalme amezaliwa. Hebu na tuifuata nyota hii. Kwani twaweza kumwona mfalme huyu. Pia, tutampelekea zawadi,” mwingine akaongeza.

Mamajusi hao walikuwa na elimu sana. Walijua habari za nyota. Walifahamu kwamba kulikuwa na nyota maalum (angani) mbinguni.

Walianza kujitayarisha kwa safari yao. Wakaweka mizigo na zawadi zao juu ya ngamia. Kila mmoja alibeba zawadi maalum kwa ajili ya mfalme aliyezaliwa. Mmoja wao alibeba dhahabu, mwingine akachukua manukato mazuri ya uvumba na watatu naye alibeba manemane.

Watu hao walisafiri kwa muda mrefu sana kabla ya kufika Yerusalemu. Wakaenda hadi kwa mfalme Herode. Wakamwuliza habari za mfalme aliyezaliwa.

Mfalme Herode alifadhaika sana aliposikia habari hii. Hakujua kuwepo kwa mfalme mwingine. Hatimaye aliwauliza makuhani na waandishi kuhusu habari hii.

“Manabii wamesema kwamba atazaliwa Bethlehemu. Naye atatawala wana wa Israeli,” kuhani mmoja akamwambia.

Mfalme Herode hakuhitaji mtawala mwingine. “Nendeni mkatafute habari za mtoto huyu. Mtakapompata, niambieni na mimi. Kwani mani ningependa kumsujudia pia.”

Herode alikuwa mtu mkatili. Hakuwa na nia ya kumsujudia Yesu, bali alitaka kumwua tu.

Mamajusi hao waliondoka. Wakaifuata nyota hiyo hadi Bethlehemu. Mwishowe, walimpata Yesu na Mariamu, mama yake. Wakaanguka na kumsujudia. Walimtolea zawadi zao na wakamsifu Mungu kwa kumtuma mfalme mwingine.

Usiku huo huo, malaika aliwatokezea mamajusi hao. Akawaonya kwamba wasirudi kwa Herode wala kumpasha habari hii. Nao walifuata njia nyingine hadi nyumbani kwao.

Msingi wa somo ni Mathayo 2:1-12

No. 52 Mamajusi Wamletea Yesu Zawadi

© Copyright 1986, Baptist Publications House, Nairobi, Kenya. All Rights Reserved



"Mshukuru Bwana" (Zaburi 136:1)